

إِنَّ الدِّينَ عِنْدَ اللَّهِ الْإِسْلَامُ



لَا إِلَهَ إِلَّا اللَّهُ مُحَمَّدٌ رَّسُولُ اللَّهِ

# Khutba Jummah

HADHRAT MUHYI-UD-DIN AL-KHALIFATULLAH

*Munir Ahmad Azim*

17 Août 2018  
(05 Dhul-Hijjah 1439 AH)

***Après ki li fine salué tous so bane disciples (et tous bane Musulmans) entier le monde avec le Salaam - la Salutation de paix dans l'Islam - Hazrat Khalifatullah (atba) fine lire Tashahhud, Ta'uz, Surah Al Fatiha, et ensuite li fine axé so Khutba lor: « Hajj et Ziarat Madina Sharif ».***

Ki dire Hajj dire aussi le Sacrifice de Hazrat Ibrahim (as). Fine rapporté ki le Saint Prophète (saws) fine dire : « Celui ki fine prend bane dispositions pour accomplir le Qurbani (Sacrifice d'Animal pour Eid-ul-Adha); alors depuis le 1<sup>er</sup> Dhul-Hijjah, faudé pas li coupe so cheveux ou so bane z'ongles jusqu'à ki so Qurbani (so zanimo) fine égorgé. » (Muslim).

Donc li recommandé pour tous bane ki prend part dans bane z'animaux (part Qurbani) ki zot pas coupe zot cheveux à partir du 1<sup>er</sup> Dhul-Hijjah. C'est à noter ki bane jours et bane la nites de Dhul-Hijjah zot sacrés et donc, profiter pour garde *Roza* et faire bane bons travaux. Faudé pas zot ena bane soupçons, et faire palabres, faudé pas zot disputer parski tout sa là c'est travail Shaytane. Allah et So bane anges pas reste parmi sa bane catégories de bane dimounes là. Respectez bane grands, gagne l'amour et l'obéissance pour zot, faire *duahs* et le *Zikrullah*, lire le Quran, essaye transforme zot-même, éloigne-zot de bane mauvais actions, remplace tous bane mauvais actions par bane bon actions pour ki zot capave gagne l'amour d'Allah et ki Allah (swt) Li satisfait avec zot.

Allah c'est Li Le Tout-Puissant, Le Créateur de tout kitchose. Li pas bizin nous bane la prières et nous bane actions pareil couma Li faire nous conner clairement dans Quran Shareef :

« Pas ena aucaine doute ki premier la Caze (Masjid) ki ti construire pou bane dimounes, c'était à *Bakkah* (Makkah/ La Mecque). Li béni et li servi comme guide pou l'humanité. Là-dans ena bane signes claires et parmi sa bane signes là, place kot Ibrahim ti diboute. Celui ki entre là-dans, li en securité. Li obligatoire à tout dimoune ki ena les moyens, pou faire Hajj (pèlerinage) dans la Caze (Haram Shareef), pou Allah. Mais celui ki rejette la foi (bizin rappeler) ki Allah pas bizin nannié ar aucaine créature. » (Al-Imran 3: 97-98).

Dans beaucoup les autres versets sa concept là li clairement exposé à l'humanité ki Allah (swt) Li pas ena aucaine besoin de bane créatures et de zot la prières. Sa fine également mentionner dans ene Hadith Qudsi (Sacré) kot Allah dire :

« Ô Mo bane serviteurs ! Ene tort ki vine de zot pas pou capave atteindre Moi, zot pas pou capave faire Moi ditort ditout. Et zot pas pou capave non plus faire Moi ene bien, ni profite Moi dans n'importe ki façon. »

« Ô Mo bane serviteurs ! Si le premier et le dernier d'entre zot, bane humains et bane Jinns parmi zot, si tous ti aussi pieux ki lé cœur de l'homme le plus pieux d'entre zot, sa pas ti pou grandi Mo royaume dans n'importe ki façon! »

« Ô Mo bane serviteurs ! Si le premier et le dernier d'entre zot, bane humains et bane Jinns parmi zot, ti aussi pervers ki le plus pervers parmi zot, sa pas ti pou diminuer en nannié Mo royaume. »

« Ô Mo bane serviteurs ! Si le premier et le dernier d'entre zot, bane humains et bane Jinns parmi zot, zot tous ti lever lors ene sel place pour faire Moi ene demande et si Mo ti accorde à sakaine d'entre zot saki li fine demander, sa pas ti pou diminuer en nannié saki Mo possédé, pas plus ki ene z'aiguille ki enforcer dans la mer pas diminuer (en nannié l'étendu de la mer). » (Muslim, Tirmidhi, Ibn Majah).

Nous capave conclure ki bane obligations établi dans l'Islam ainsi ki bane actions interdits zot basé lor la connaissance et la sagesse d'Allah (swt) dans ene harmonie parfait avec la nature de l'homme couma fine crée par Li (swt) et la mission et bane l'objectifs de l'homme dans sa le monde là fine donne li tout sa afin ki li être

récompenser pour tout sa dans *Aakhérat*. En bref, bane kitchoses ki ena à faire et saki faudé pas faire zot destiné pou bénéficier l'humanité et la société en général.

Ene fois ki sa clair dans nous l'esprit, le Hajj étant ene pilier de l'Islam démontrer clairement bane l'avantages spirituels, mentales, physiques et même financiers ki énorme à l'humanité en entier et la société.

Bane la prières et bane formes de dévotion dans Islam ena ene l'influence directe lor nous la vie spirituelle ainsi ki nous la vie matérielle couma mentionné dans bane versets suivants :

« **Demande pardon avec ou Maître et tourne vers Li. Li pou laisse ou jouir bien...** » (Hud 11 : 4).

« **Ô mo peuple, demande pardon avec ou Maître, tourne vers Li. Li va envoie ou (la pluie) en abondance, depuis lor léciel, et Li va augmente pouvoir ki ou ena.** » (Hud 11 : 53).

Pareil couma li aussi mentionné dans bane traditions du Saint Prophète (saws) : « *Si ene dimoune répentir continuellement, Allah pou accorde li ene moyen pour sorti de so détresse, ene soulagement pour so bane soucis, et Allah pou fourni d'ene l'endroit ki li pas ti pou maziné.* » (Abu Dawud, Ibn Majah).

Bane versets Quran aussi zot talli avec sa Hadith là, zot ena même sens, kot Hazrat Muhammad (saws) fine dire : « *Accompli le Hajj et Umrah ene derrière lotte ; parski zot enlève la pauvreté et bane péchés couma soufflet enlève bane impuretés dépi fer.* » (An-Nasäi).

**Bane bienfaits du Hajj :** Le Saint Prophète (saws) fine dire concernant le cinquième pilier de l'Islam: « *Celui ki accompli le Hajj pour le plaisir d'Allah et abstenir li de bane relations sexuelles avec so madame, et pas commette bane péchés, li pou rentrer (sans aucaine péchés, après le Hajj) couma dire ene nouveau-né.* » (Bukhari).

Accomplir *Umrah* li ene expiation pour bane péchés ki ene dimoune fine commette (entre ene précédent *Umrah*, et ene nouvo *Umrah*). Et la récompense d'ene *Hajj Mabru* (ki accepté par Allah) c'est le paradis. (Bukhari).

Nous capave remarquer ki nous bien-aimé prophète (saws) fine insisté, dans les deux Hadiths ki mo fine cité, lor bane conditions afin ki nous capave profite de bane

bienfaits du Hajj : *Celui ki abstenir li de bane relations sexuelles avec so madame et ki pas commette péchés.*

**Ene Hajj ki Accepté :** Donc, nous bizin vigilants pendant le Hajj pour ki nous pas commette péché, parski sa li ene condition précisé par le Saint Prophète (saws), afin ki nous capave profite de bane bienfaits associé à sa pilier de l'islam là. *Insha-Allah.*

**La Visite Pieuse à Madina Sharif :** Kan zot alle pour le Hajj et *Umrah*, zot bizin aussi profite l'occasion pour alle dans la ville du Saint Prophète (saws) : *Madina Al-Munawara.*

La ville du Saint Prophète (saws) li situé à environ 600km au Nord de Makkah. C'est la ville ki le Saint Prophète (saws) fine émigrer kan li fine sorti de Makkah. Sa émigration là marque le début du calendrier Islamique : *Al-Hijjah* ki veut dire, Émigration.

La ville li aussi universellement connue comme **MADINAT-UL-MUNAWARA** (La Ville Lumière), parski le Saint Prophète (saws) li-même li ene la « lumière » (*Noor*). Et c'est de là, de sa l'endroit là ki la lumière et la guidance fine propagé à l'humanité en entier. Visite sa l'endroit là li ene de bane plus grands bénédictions ki Allah fine réserve au croyant parski Masjid du Saint Prophète (saws) trouve là-bas et li sa même Masjid ki pli sacré ki tous les reste Masjid après *Ka'aba Sharif*, ki premier Masjid ki ti fine construire pour l'humanité.

En plisse de sa, celui ki, après avoir ki li fine accompli le Hajj trouve dans li ene grand désir pou demande bane *duahs* pour le Messenger d'Allah (saws) kot *Rawdah Moubarak* kot le Saint Prophète Muhammad (saws) so tombe été, alors sa dimoune là bizin faire li avec dévotion et respect sans le moindre trace de *Shirk*. Là-dans ena ene très grand récompense ki nous pas capave même imaginer.

D'après ene Hadith du Saint Prophète Muhammad (saws) concernant so Masjid dans Madina, et ki rapporté par Hazrat Abu Huraira (ra), le Messenger d'Allah (saws) fine dire :

*« Ene Salât dans Mo Masjid li meilleure ki mille Salât dans ene l'autre masjid, à l'exception de Haram Shareef (Masjid Sacré/ Ka'aba Shareef). »* (Bukhari & Muslim).

Le Saint Prophète (saws) fine dire : « *L'espace ki ena entre mo Mimbar et mo la case li ene de bane jardin du paradis.* » (Bukhari & Muslim). Sa l'endroit li connu couma *Rawda-ul-Jannah*.

Le Saint Prophète Muhammad (saws) fine aussi dire : « *Celui ki accompli le hajj et ki rende visite à mo tombe après mo la mort li couma celui ki ti fine rende moi visite pendant mo vivant.* » (Baihaqi, Tabarani).

D'après mo humble l'opinion, sakaine bizin faire ene z'effort particulier pour récite le *Darood Sharif* en abondance. Pli nous pou lire le *Darood Sharif*, plus nous pou gagne bane profits et plus nous l'amour pour le Messenger d'Allah Hazrat Muhammad (saws) pou augmenter. La récitation du *Darood Sharif* li pas réservé pour bane ki accompli Hajj ou *Umrah*. Li fine prescrire pour tous bane croyants tout au long de zot la vie. Mais durant période de Hajj, li recommandé pou récite le *Darood Sharif* autant ki zot capave, surtout pour bane ki visite la ville du Prophète (saws) avant ou après le Hajj ou *Umrah*.

Quand ou approche ou de Madina Sharif, faire li avec le plus grand respect et zot bizin extrêmement poli, et pas disputer, pas la guerre pou nannié et pas lève zot la voix pou disputer, et pas insulter zot bane frères ou sœurs. Zot bizin au moins ena ene respect pour sa la ville sacré là. Pas laisse zot visite dans bane l'endroits ki plus sacrés dans le monde alle dans vide. Récite plutôt autant de *Darood Sharif* ki zot capave. Rentre dans *Masjid-an-Nabawi* avec lipié droite. Alle ensuite à *Riyad-ul-Jannah*, l'endroit ki trouve entre le *Rawdah* et *Minbar* du Saint Prophète Muhammad (saws) et faire 2 *Rakât* de *Tahiyatul Masjid* (2 Rakaat Namaz kan rentre dans Masjid). Remercier Allah (swt) ki Li fine accorde zot sa grand *Tawfeeq* là.

En lisant le *Darood Sharif* rapproche zot de *Rawdah Moubarak* du Messenger d'Allah (saws), ensuite avance un peu à droite et faire *duahs* pour Hazrat Abu Bakr Siddique (ra) le 1<sup>er</sup> Calife de l'Islam, et ensuite pour Hazrat Umar (ra) le 2<sup>ème</sup> Calife pendant zot séjour à Madina Sharif.

La visite pieuse (*Ziarat*) de Madina Sharif comprend plusieurs étapes, parski ena beaucoup l'endroits historiques pou visiter, bane l'endroits et bane l'évènements ki fine marque l'Islam à so bane tout débuts. Ena entre autres :

- Jannatul- Baqi
- Masjid-e-Quba
- Masjid-e-Qiblatain

- Masjid-e-Jummah
- Masjid-e-Ghamama
- Masjid-e-Ali
- Masjid-e-Umar

Qabarastan *Jannat-ul-Baqi* c'est cimetière kot ene très grand nombre de bane compagnons (*Sahaba*) du Saint Prophète Muhammad (saws) fine enterré. Par exemple, Hazrat Uthman (ra) le 3<sup>ème</sup> Calife de l'islam, Hazrat Abbas (ra) Chacha du Messenger d'Allah (saws), Hazrat Ummul Mumineen Aisha (ra) - la maman de bane croyants, Hazrat Bibi Fatima (ra) tifille du Messenger d'Allah (saws) etc.

En sa période bénie de Hajj, mo faire *duahs* pour tous bane *Hajjis* (pèlerins) afin ki Allah accepter zot Hajj, pardonne zot et inspire zot la volonté pour reste fidèle à zot réforme en sa l'époque béni là et pou vivre zot la vie dans le plaisir d'Allah et pou mort aussi dans le plaisir d'Allah. *Ameen*. Ki zot voyage pour accomplir le cinquième pilier de l'islam li rempli de la miséricorde divine et ki Allah inspire zot, ainsi ki zot bane descendants pou reconnaître So bane signes et manifestations dans la forme le plus parfait. *Insha-Allah. Ameen*.

Et mo faire *duahs* pou tous bane dimounes ki d'une façon ou d'une autre fine toucher avec bane calamités : tremblements de terre, inondations, glissement de terrains et bane accidents de toute sortes. Comme ene Messenger d'Allah, li ti mo devoir pou informe zot ki sa bane calamités là pou contigne augmenter, pas pou arrêter ziska dimounes change cours de zot la vie pour le meilleur, et ki zot prend conscience de l'unicité d'Allah et zot travaille pou rétablir ene équilibre dans zot propre la vie, dans zot l'environnement et dans la société et le monde en générale.

Li malheureux saki fine passer dans le Sud de l'Inde, dans Kerala kot fine ena gros la pluie depuis premier semaine de Août 2018 ki fine cause bane inondations terrible, et sa la pluie et inondations là li le plus intense depuis à peu près 100 cents, plus précisément depuis 1924. Valeur du jour, fine ena un peu plisse ki ene centaine de morts. Nous faire *duahs* ki Allah gagne pitié de l'humanité et de So bane serviteurs dans Kerala, mo bane chers disciples et aide zot dans sa bane moments difficile là et aide zot pou ki zot aide zot prochain avec beaucoup de considération et de respect, dans l'esprit de l'unité et de service à l'humanité pour l'amour d'Allah. *Insha-Allah, Ameen*.